

Inatsisartut aaliangiiffigisassaattut siunnersuut Naalakkersuisut peqquneqassasut Naammassisaqarsinnaassuseqarnermik (produktivitet) ataatsimiisitaliarsuarmik pilersitsissasut.

(Inatsisartunut ilaasortaq Per Rosing-Petersen, Attaviitsoq)

Akissuteqaat

(Naalakkersuisoq for Finanser og Skatter)

Aappassaaneerinnineq

Inuussutissarsiornermut Ataatsimiititaliaq aalajangiiffigisassatut siunnersuutip suliarineqarnerani sukumiisumik sulisimaneranut Naalakkersuisut sinnerlugit qutsavigaara. Ataatsimiititaliap isumaqatigiittup aalajangiiffigisassatut siunnersuutip itigartinneqarnissaanik inassuteqarnerat Naalakkersuisut maluginiarpaat.

Ataatsimiititaliap isumaliutissiisummini misissueqqissaarnerit misissuinerillu arlalissuit suliarineqareersimanerannik tunngavilersornera Naalakkersuisut maluginiarpaat. Tamannalu tunngavigalugu misissueqqissaarnermik misissuinerillu sulii amerlanerusunik suliaqarnani, suliniutinik sukumiisunik aallartitsisoqarnissaanik pisariaqartitsisoqarnera erseqqissaatigaa.

Tamatuma saniatigut inuit ataasiakkaat inuiaqatigiillu naammassisinnaasaannik qaffaaniarluni ilungersuuteqarnermi ilinniartitaanerup pingaarutilimmik inissisimaneramik Ataatsimiititaliap pingaartitsilluni oqariartuutaa, Naalakkersuisut maluginiarpaat. Tamatumalu Naalakkersuisut Napatitsinissamut Siuariartortitsinermullu pilersaarutaanni ilaanera Ataatsimiititaliap maluginiarpaa, taamaalillunilu Napatitsinissamut Siuariartortitsinermullu pilersaarummi kaammattuutigineqartut nanginneqarnerat iluaqutaassasoq ataatsimiititaliap ilanngullugu maluginiarpaa.

Inuussutissarsiornermut Ataatsimiititaliap siuliani nalilersuutai, ataatsimiititaliallu inassuteqaataa Naalakkersuisut taperserpaat.